



Putsup gassiinut imermik saligutikumik umiarsuit Kalaallit Nunaata imartaani kuutsitsinissaanik inerteqquteqarnissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqaq Justus Hansen, Demokraatit)

(Siullermeerneqarnera)

Qujanaq Demokraatit inatsisartunut ilaasortaataitaannut Justus Hansen siunnersuummut pitsaasumut.

iluarinarpoq, siunnersuuteqartup imartatta illersorneqarnissaa ukkatarimmagu. Avatangiiseq, aalisarneq aamma inuussutissat ipiitsut kinaassutsitta, aningaasaqarniarnitta aammalu siunissatta ilagaat.

Taamaattumik imartatta mingutsinneqarnera imaannaangitsutut isigissavarput.

Putsup gassiinik saligutikumik umiarsuarniit aniatitsineq, isiginngitsuusaaginnarsinnaangilarput. Imeq akuutissanik ulorianartunik akulik immamut kuutsinneqarpat, aalisakkat, qaleruallit, imarmiut aammalu issittumi pinngortitap ataqatigiinnera mianernareersoq, sunnerneqarsinnaapput. Tamanna avatangiisitsinnut, peqqinnermut aammalu mingutsigaanngitsunik inuutissanik avammut tuniniaanerup tatiginarnera tatineqarneranut tunngassuteqarpoq.

Taamaattumik Demokraatit pitsaasutut isigaat, Naalakkersuisut siunnersuutip siunertaa isumaqatigimmassuk atorunnaartitsiartuaarnissarlu sulissutigilereerlugu. Silatusaarneruvoq, inerteqquteqarnerup ima eqqunneqarnissaa, suliaqarnermut inatsisitigullu pissutsit pingaartinneqarlutik, aammalu inuussutissarsiortut ersarissumik piffissamut pilersaarummik malitaqartinnissaat.

Maluginiarparput, Naalakkersuisut putsup gassiinik saligutikumik aniatitsivinnit ammasunit aniatitsinerit 1. juli 2027 inerteqqutigineqalernissaat siunniukkat aammalu tamakkiisumik inerteqquteqalernerneq pissasoq 1. juli 2029-miit. Akisussaassuseqartumik iliuseqarnertut isikkoqarpoq, imartatsinnik illersuinissaq ersarilluni, tassungalu ilutigalugu allanngineq kusanartumik ingerlanneqassasutut isikkoqarluni.

Demokraatinut pingaartuuvoq, maani nunatsinni issittup imartaanik illersuinermut siuttuunissarput. Imartarput inuuniutigaarput, nerisaqarfigaarput, akisussaaffigaarpullu kingulitsinnut tulliuuttunut imartatta ipiitsup ingerlateqqinnissaa.

Demokraatit siunnersuut siullem aammalu Naalakkersuisut allannguutissatut siunnersuutaat Eqqissimatitsinermut- aamma Avatangiisinullu ataatsimiititaliami suliareqqinneqartussatut innersuussutigaa.

